

KERNBORSCH VUM HESSISCHE HOCH



WORFFELLE

REZESPRUCH 1903

## Kerwespruch '93

Zum elfte mol hier uff em Disch  
begrieß ich euch un zitter ich  
denn ehr wißt wos jetz passiert  
ich hob mer alles hier notiert  
wos die Leit getriwwe honn  
will ich eich erzähle donn  
doch de erst muß ich eich soache  
des Thema dut mich forschbar ploache  
wie mer Kerweborsch uns honn geqeelt  
domit die Musik wirrer speelt  
denn gerüchte weis wie es im Ertche hieß  
de Monfred uns die Kerb vermießt  
als Hotelier des es halt so  
do es fer Kerb koan Platz meh do  
doch trotz all dem ehr kennt mer's glawwe  
honn mer die Kerb doch aus gegroawe  
un ach Desjohr hier beim Klinke Kall  
dut's wirrer mol en große Knall  
un deshalb soin mer doppelt froh  
wonns haaßt: "DIE Worfeller Kerb is do".

Ehr Leit ich will eich jetz berichte  
ich du mer's net zoamme dichte  
vum Hotelbau glei hier hinne  
ich wills eich uff die Nos jetz binne  
Im letzte Johr glei noch de Kerb  
mer Kerweborsch worn all noch merb  
do dut de Monfred uns bestelle  
mer mußte kumme uff de Stelle  
do soacht der uns gonz ungeniert  
wos mit de Scheier baal passiert  
"Ehr Buwe es kumme velleicht baal schlechte Zeite  
donn will ich eh Hotelsch leite  
deshalb hob ich vum Kerwegeld  
mer en "Arschitekt" bestellt.  
Der "Arschitekt" des is en schlaue  
wills Hotel uff die Scheier baue  
es Dach ob un en Stock enuff  
un unne im dem olde Kapuff  
do werd donn de Empfang mol soi  
un eh Bar mit em Klavier des muß enoi  
eh Scheißhaus mit goldne Amarn  
en Billiardraum mit Ständeruhrn  
en Keller mit em Schwimmingpool  
eh Solarium mit em Sunnestuhl  
un weil es Zimmer kost veel Geld  
die Bettwäsch es vum Lagerfeld  
un oan de Trepp do henge Bilder vum van Goch  
un des im so em olde Loch.



"Ehr liwe Leit ehr kennt mers glawwe  
dem Kerl dut soi Gehern doch stawwe  
die Fundamente soin doch veel zu schwach  
ich was des denn ich bin vum Fach"  
so dut der Maurer lauthals stehne  
em Monfred laafe fast die Trene  
als der kimmt mit soim große Woache  
un dut die Scheier zoammehache  
em Monfred gefalle dut des net  
un Noachts do kimmt er net ins Bett  
Kreb des muß jertz wirrer soi  
sunst kimmt jo koa Geld meh noi  
so war uns des Glick beschert  
sunst war die Kerb wie weggekehrt.

### WIEDER PFUSCH AM BAU!

Wie von der Faust eines Riesen gefällt, brach heute das neue Bauskandal-Zentrum der Baubehörde zusammen und sorgte damit schon vor der Fertigstellung für seinen ersten Skandal.

Gegen den Geschäftsführer der mit der Bauausführung beauftragten „Korrupta GmbH & Co. KG“ wurde Haftbefehl erlassen und...

Vun moim geschwätz ehr kennt mers glawwe  
dut moi Zung gonz schrecklich stawwe  
drumm soll sich jertz moi Lewwer dücke  
un moi Milz werd zwomol zücke  
denn ich trink des muß jertz soi  
vun unserm gude Kerwewoi.


Zum entsponne des is klar  
is Oangeln oafach wunderbar  
mer hengt die Fieß ins Wasser noi  
un kippt sich zwo drei Bierscher roi  
die Sunn die schoint oam uff de Pelz  
"heit fong ich bestimmt en Welz"  
so hert mer oaner rumgrakehle  
un dut mit Bier die Kehl sich ehle.  
On soem Doach bei soner Hitze  
soin selbst Oangler voll oam schwitze  
besonders schlimm do werd des donn  
wonn die in ehrm volle Knorrrn  
dun ehr Blinker uffpoliern  
un se on die Oangel schnürren  
denn des glänzende Metall  
benutze die als Köderfall.  
"Uff die Technik es verlass  
des haacht de Borrem aus em Fass  
do kumme die Raubfisch wie die Lumpe  
un dun sich um de Ködre pumpe"  
so hert mer unsern Siggi protze  
un dut debei ach noch schnell ....  
er will soi Oangel schnell montiern  
un dut groad in de Himmel stiern  
er hengt soin Blinker vorne noi  
un werft die Oangel in de Rhoi  
donn muß er gonz schnell uff de Klo  
un spurtet loß mit Horrido  
doch unnerwegs do fällts em uff  
"moin Audoschlüssel hengt oam Haacke druff"  
un als er kimmt zurick gerennt  
en Hecht schunn on de Oangel hengt.

Na endlich! Einer hat angebissen!  
Was das wohl ist? Ein Thunfisch?  
Eine Makrele...



Do worn soi soje schnell vergesse  
 "heit Owend gibts en Hecht zum esse  
 noa den heng ich in Trophähenschrank  
 do werd de Suschter Gerhard kronk  
 wonn der den sieht do werd der blass"  
 unerdess de Hecht im kühle Nass  
 wie en dolle on de Schnurr rumreißt  
 un des Ding in Stücke beißt.  
 Unsern Siggie der dut schelle  
 un det oam liebste gonz laud belle  
 weil der Hecht der es verzückt  
 mit em Schlissel vum Siggie obgerickt  
 Siggie do hoßte oan gerisse  
 hest doin Schlissel besser fortgeschmisse  
 doch die Aktion die war echt gut  
 ich zieh vor dir hier moien Hut  
 drum singe mer wie es des schee  
 "DIE FISCHERIN VOM BODENSEE".

O-O-O-ODER E-E-E-EIN  
 HUUUUUUUHN?!




Mer wolle glei beim Wasser bleibe  
 ich du's bestimmt net iwertreiw  
 denn ach Bootfahrn des is schee  
 un so was macht mer uff em See

Im letzte Jahr die soin gewitzt  
 zwaa Worfeller noch Irland obgflitzt  
 um ehrn Sejelschoi zu mache  
 ehr liwe Leit dut jetzt net lache  
 denn dort ,es des net foi  
 do muß des gonz schee leichter soi  
 so wie bei Neckermann bestellt  
 un des ach noch ver wenisch Geld  
 honn die ehrn Sejelschoi gekricht  
 un soin donn wirrer hoamgezischt  
 Dehoam oagekumme dun die Dolle  
 ehr gonzes Geld vum Konto holle  
 um's in eh Bootsche zu investieren  
 der Reeder dut dick obkassiern  
 doch die Buwe die worn stolz  
 "Unsinkbar denn aus Bucheholz".

Was MACHST du  
 denn da?!

Ich suche die Versi-  
 cherungsunterla-  
 gen!




Dsejohr do gabs koa lange Worte  
 sie fahrn enuff in hohe Norde  
 doch schunn uff de Audobahn  
 verliern se vun ehre olde Kahn  
 es "Lenkrad" un es Ruderblatt  
 do warn se es Schiff fahrn fast schunn satt.  
 Do kimmt em Harald eh Idee  
 "mer trinke erstemol en Tee  
 un dun donn aus verschiedene Sach  
 uns eh neies Ruder mache".

Do warn die Buwe wirrer froh  
 un presche los mit Horrido  
 es Schiff vum Henger in de See  
 un ziehen es Sejel in die Hee  
 de Oanker hoch die Leine los  
 im Laderaum steht schunn die Soß  
 so honn die Helde obgelegt  
 es Boot sich longsom fortbewegt  
 doch weiter drause im tiefere Gewässer  
 schwimme im Bug ach schunn die Fässer  
 de Zwieback naß, de Rum vredinnt  
 es Wasser dorch die Ritze kimmt  
 es knierscht un kracht in alle Ecke  
 "Des Boot des dut jo nur noch lecke"  
 un wie im Nordmeer uff de Titanik  
 honn die zwo uff ehm Bootsche schunn die Panik  
 donn es des Boot gonz unverdrosse  
 mit unsere Helde obgesoffe.  
 Zuerst honn se oam Mast noch drogehonge  
 un soin oans Ufer donn geschwomme  
 ehr schee Bootsche des wor weg  
 mer hert se fluche: "Soen Dreck"  
 Schecker un Löw ehr seit zwo Asse  
 det des Bootfahen besser lasse  
 drum singe halt so wie's ist  
 "UN ALSEMOL GESOFFE UN ALSEMOL GEPISTT".

Moi Zung die es mit Staab belegt  
 moin Kehlkopp sich nur bewegt  
 moi Stimmbänder die soin verrobt  
 moin Gaume hoch un runner kloppt  
 drum du ich jetzt ehm Monfred winke  
 kumm her ich will eh Woische trinke

Eh Gewöhnlich Geburtstagsfeier  
 is net immer nur die olde Leier  
 ob un on do werd des gonz famos  
 donn es do voll de Deifel los  
 de Nachbar dut sich mol beschwern  
 doch sowos dut mer iwwerhern  
 mer feiert weiter unbeschwert  
 so rischdisch wie sich des geheert  
 Gehe end do werd des meist noch schlimmer  
 es hocke noch 4 Leit im Zimmer  
 dann fange se oh Dart zu speele  
 un dun dabei erumkrakele  
 "Wer verliert der muß e bisje Unsinn mache  
 do hann all ganz veel zu lache"  
 die Rund war rum, de erst verliert  
 de Hunger stark nach Pizza giert  
 do muß er los bein Dieter Hut  
 "5 Pizzas schmecke immer gut".



Die esse ehr Pizza un dun ehr Spiel vortsetze  
 doch zu ehm Torsten soim entsetze  
 ei do war der Dappes  
 glatt zum zweite mol de Kappes  
 er muß mit ehm Schubkahn in de Unnerhos  
 dorch Ertche wetze : "mach dich los"  
 so hert mer noch die oannen töne  
 " Revache gibt des" dut er noch stöne  
 "Die nächst Rund die verlier ich net  
 un donn donn kimmt 's rischdisch fett  
 de nächst der laaft völlisch nackisch  
 un bittesche net gonz so zackisch  
 vun hier bis on de Linneboam  
 un donn do kimmer wirrer hoam  
 weil donn hob ich mol was zu lache  
 un dun mer ach eh Späsje mache".  
 Er kimmt zurick die Pfeile fliehe  
 de Runge dut weit hinne liehe  
 uff amol macht de Emig schluß  
 un gibt ehm Runge noch en Kuß  
 "Las die Hülle falle un mach fort  
 nackisch rennt er donn dorschs Ort  
 de Dieter mit ehm Audo hinnedroi  
 hupt un schalt die Lichteroi  
 die Leit honn velleicht bleed geguckt  
 un honn die Schuldern mol gezuckt  
 de Runge krigt en rode Kopp  
 un sieht fast aus wie en olde Mopp  
 doch die Aktion die wohr famos  
 un dorum singe mer jetz los  
 so wie's hier im Spruch droi steht  
 "WENN DAS SO WEITER GEHT".



Ehr Leit moi letzt Geschicht  
 die krigt ehr noch schnell uffgedischt  
 es geht dorum mer kennt fast denke  
 mer mist sich hier jo arg verenke  
 um eh Frau sich schnell zu schnappe  
 muß mer net noch China dappe.  
 Ach Litauen des muß net soi  
 so was gibts ach iwerm Rhoi  
 ach hir bei uns des is doch klar  
 gibt's eh hübsche Frauen Schar  
 sunst det'e mer, ehr kent's eich denke  
 uns oan Kerb doch net verenke  
 denn mer mache uns, so muß des soi  
 oan Kerb ver hübsche Mädcher foi  
 so moansch oam, des kann isch soache  
 dem hots oan Kerb soi Herz verschloache  
 doch eigentlich is des egal  
 die Hauptsach is mer trifft soi Wahl  
 ob jetz vun noh ower ah vun fern  
 es geht dorum mer hot sich gern  
 seit net beß, macht eich nix draus  
 ach ich such mer noch moi Maus.  
 Drum singe mer sowie noch nie  
 "MER SOIN DIE JUNGS VUN DE KERWEKOMPANIE".



Der Spruch der es jetzt oan soim End  
nimmt eier Kinner on die Händ  
un kummt heit Owend wirrer roi  
bie Weck, Worscht un a Woi  
mer feiern singe un dun lache  
ich lad eich oi laßts mit uns krache  
heit Owend hier des werd de Hit  
mer Kerweborsch mer soin noch fit  
mer dun donze wie die Wilde  
kummt enoi un sied im Bilde  
wonn mer dorsch de Soal dun fege  
un dun eh flotte Sohl hielege  
doch ich glaab ich muß jetzt longsom geh  
ehm Watz dun jo die Fieß schunn weh  
wonn der jetzt nix zu trinke krigt  
stinkt der aus ehm Hals jo wie verrickt  
Ja du Watz ich kumm jo glei  
seid ehr hiet Owend mit debei ?  
wonn die Musik speelt so froh  
"DIE WOFELLER KERB IS DO !!!!!

